



Segund post per Otto Bass en la concorrenza arma da sport duas pusiziuns.

FOTOS G. N. STIGIER

Nov record grischun entras Georg Maurer

Tir: Occurrenza d'avertura dals matscheurs grischuns

DA GION NUTEGN STIGIER / ANR

■ La stagiun da tir ha cumenzà sonda passada en il Partenz. Sa participads a l'emprima occurrenza èn damain tiradurs, persuenter han els sajettà precis e bain. Persvas han cunzunt er ils tiradurs sursilvans. Per ina giada ha il tir d'avertura betg gi lieu a Cuir, mabain en divers stans da tir en il Partenz. A Grüşch han ils tiradurs cun las armas da militar (ordonnanza tratg lur program. Cun esser la vista pli che clera han els sajettà gia l'emprim di da tir resultats excellents. En la concorrenza duas pusiziuns, 30 culps en venter e 30 culps en schanuglias, ha gia sco il 2015 *Mirjam Hartmann* da Seewis-Schmitten tratg cun 540 puncts il pli ferm. Segund è vegnì *Walter Widmaier* dad Aschera e tratg ha el 533 puncts. Il medem resultat è er reussì a *Hermann Jemmi* da Castrisch, però cun avair en la valitaziun da 100 in culp pli bass che ses concurrent dal Partenz ha il tiradur sursilvan cuntanschì il terz post. L'occurrenza en venter ha gudagnà cun 566 puncts *Andrea Striffler* da Tavau avant il victur da l'onn 2015 *Dirk Frischknecht* da Tumeagl, el che ha sajettà 565 puncts. Cun in resul-

tat da 561 puncts ha *Walter Widmaier* obtegnì il terz post en quella concorrenza.

Finalmain in nov record grischun

Ad Aschera èn sa mesirads ils matscheurs che sajettan cun l'arma da sport e l'arma libra. Bain en furma para gia dad esser *Georg Maurer*, il tiradur da Favugn. En la concorrenza duas pusiziuns ha el fatg 591 puncts e laschà nagina schanza als concurrents. En venter ha *Georg Maurer* manchentà da far il resultat maximal da 300 puncts be per in punct ed en schanuglias ha el sajettà 292 puncts da 300 puncts pussaivels. Cun il total da 591 puncts ha Maurer tratg in nov record grischun e cun quel resultat tutga el er en Svizra tar l'elita. Fin sonda passada era il record grischun 587 puncts sajettads avant 11 onn dad *Urs Beat Waser* dad Andeer ed avant sis onns dal nov purtader dal record *Georg Maurer*. Cun *Otto Bass* da Sumvitg sco segund cun 576 puncts e *Silvio Pitsch* da Müstair sco terz cun 567 puncts cumpletteschan dus tiradurs da l'intschess rumantsch il podest tar la concorrenza da duas pusiziuns arma da sport. Quella en venter ha gudagnà *Urs Brazzerol* da Farrera e quai

cun 591 puncts ed er qua figuran cun *Alfons Maissen* cun 572 puncts e *Paul Venzin* cun 571 puncts dus tiradurs sursilvans tranter ils trais meglers.

Ina giada dapli Elmar Fallet

Betg cun l'arma da militar ubain cun quella da sport, mabain cun la pistola, ha tratg *Elmar Fallet* da Müstair sin 50 m il program B. Il victur da la concorrenza da chantuns tar la Festa da tir federala 2015 en il Vallais ha sajettà sonda passada a Cuvlignas 566 puncts e guadagnà la concorrenza. *Guido Zellweger* da Zernez è vegnì segund cun 561 puncts e *Peter Strebel* da Pragg-Jenaz ha cuntanschì il terz post cun in resultat da 548 puncts. A Landquart han ils tiradurs, arma 50 m, absolvi lur program. Decidi a sia favur il matsch da trais pusiziuns ha cun 581 puncts *Olivia Hofmann* da Puntina (Innsbruck) e *Lars Färber* da Favugn sco segund ha tratg diesch puncts damain. Terz è vegnì *Roland Schmed* da Domat cun 561 puncts. *Corsin Derungs* da Camuns ha gudagnà cun 604,8 puncts la distanza arma 50 m elita en venter avant *Yvonne Margreth* da Castrisch cun 600,9 puncts e *Placi Caviezol* da Camuns cun 598 puncts.



Els trais èn sin il podest tar la concorrenza arma da sport en venter: Alfons Maissen, Urs Brazzerol e Paul Venzin (da san.).



Cumenzà bain la stagiun da tir cun in terz post ha er Hermann Jemmi.



Manchentà per paucs puncts il terz post ha Marcus Flury da Sumvitg.



Terz post per Silvio Pitsch da Müstair en la concorrenza da duas pusiziuns cun l'arma da standard.



En il Partenz ha gi lieu il tir d'avertura dals matscheurs grischuns.



Bunamain senza concorrenza: Elmar Fallet, il tiradur da pistola da la Val Müstair.